

Iniziatif as ist toal van an projekt va TSM|Step za gem bider bërt en de òltn paun ont en de lòntschòft van Alpn

Studentn va de Hoa Pildung en pasuach ka de bersntoler gamoa'schòft

[Mòcheno] Ver za schaung abia as de stoa' ont s holz präucht sai' kemmen za paun de haiser ont de hittn a vòrt, drinn en a rai va mearer studien, untersuachen ont aussuachen ver za derkennen de sèlln as sai' de elementn van paun van a vòrt as de Alpn, en vuoder vraita sai' gaben af pasuach ka de bersntoler gamoa'schòft de studentn va de Hoa Pildung van Institut ENAIP va Villazzano.

Der pasuach, gabellt va TSM|Step – Schual ver de Regiar van Grunt ont van Lònt abia toal van Bando PNRR Borghi en Palai en Bersntol, hòt se augatu' pet a roas za vuass en hoa toal van Bersntol ver za vertiaven der präuch van elementn ont van sistem van paun as gamòcht sai' kemmen ver de haiser ont de hittn ka de bersntoler gamoa'schòft, as schoa' studiart sai' kemmen pet de teori za schual.

Der grupp, as mitgahòp hòt ont pfiart kemmen ist van Leo Toller van Bersntoler Kulturinstitut, va de Elisa Iachelini ont van Cesare Benedetti tutor van kurs, hòt pasuach de heff Jorger ont Batister ont ist anau gòngen kan an ettlena hittn as en Jergereck ont as en Scheller. Nomitto der pasuach ist bainter gòngen kan Filzerhof, de musealsezion van Bersntoler Kulturinstitut pet de Claudia Marchesoni.

Der hoff, ver de bersntoler gamoaschòft, hòt pröpe an bërt as iberaus geat en sèll van oa'vòch haus va de familia. Er ist augòngen glaich pet de gamoa'schòft, benn as en XIII. ont en XIV. jorhundert sai' tsidelt kemmen de heachern eirter as de pèrng um Persn en an prozess as noch gabien ist za riven ont as ober tröng gahòp hòt schoa' van an ettlena jorhunderter taitscha pauern as de hoacheimen van zimberen en Trentin, en de Sim Gamoan va Vicenza ont as de Lessinipèrng va Verona. De Kirch oder de Grunthearn hom galòkt ver a schòft va jorzins a stuck grunt en an iatn sidler ver za tea' s aushòcken, veròrbetn ont verpèssern S doi stuck grunt ist gahoasn kemmen pröpe "hoff". Va de sèll zait, benn s aa vil gabèkslt ist durch s autoaln en de eredi ont s kaven ont verkaven, ist uman de doin pahalter as tònzts s lem van familie.

De architektur ont de lòntschòft van tol tröng gabiss nou hait der druck van òrbetn en de heff, en de boa'n ont en de balder as gamòcht sai' kemmen van pauern.

Der pasuach van studentn möcht toal van projekt "De kröft va de sprochminderheit: s bider augea' van a taitsches dorf en sud van Alpn", Toal nr. 29, projekt "Gem bider bërt en de òltn paun ont en de lòntschòft van Alpn: kennen òrbetn pet stoa' ont holz", gamòcht va TSM|Step Schual ver de Regiar van Grunt ont van Lònt en zòmmòrbet pet de ENAIP, der Noschauger en de trentinische Lòntschòft, der Nationalpark van Stelvio ont s Bersntoler Kulturinstitut.